

Supervizor Scanlan pohvalio rad brčanskih vlasti na suzbijanju krize prouzročene covidom-19



Prvi zamjenik visokoga predstavnika i supervizor za Brčko Distrikt, Michael Scanlan, održao je danas *online* sastanak s predsjedavajućim i dopredsjedavajućim Skupštine Distrikta Esedom Kadrićem i Ivom Filipovićem te gradonačelnikom i dogradonačelnikom Sinišom Milićem i Antom Domićem. Supervizor je čestitao brčanskim dužnosnicima, njihovim suradnicima i cjelokupnom vrijednom osoblju institucija Brčko Distrikta, na dosadašnjim naporima za suzbijanje krize prouzročene covidom-19 – kako u smislu trenutačnih aktivnosti na sprječavanju širenja zaraze, tako i opredijeljenosti za srednjoročne i dugoročne mjere za ublažavanje zdravstvenih i ekonomskih posljedica pandemije.

Supervizor je naglasio značaj suradnje, poštovanja, otvorenosti i transparentnosti u borbi protiv ove krize. „Cilj sada je da svi rade zajedno kako bi se prevazišla zdravstvena kriza te kako bi se Brčko što prije vratilo na put napretka. U ovoj krizi nema pojedinačnih pobjednika ili gubitnika. Ili će zajednica u cijelosti prevladati, ili će svi trpjeti posljedice. Uvjeran sam da će vlasti u Brčkom nastaviti s odličnim radom u korist cjelokupne zajednice.“

Supervizor Scanlan je napomenuo zvaničnicima da će on, visoki

predstavnik, kao i cijela međunarodna zajednica, nastaviti raditi na tome da Brčko bude uključeno u sva rješenja za pomoć BiH. Ovo nije pojedinačna borba, s obzirom da se cijela država suočava s istim izazovom, dodao je supervizor. Pozvao je organe vlasti i građane da se strogo pridržavaju savjeta stručnjaka i medicinskih radnika.